



Nuuk 6. marts 2015

Inatsisartut suleriaasianni § 37 naapertorlugu apeqquteqaatit imaattut naalakkersuisunut ingerlatippakka.

- 1. Eqqartuussissuserisut suliffiat sorleq Pituffimmi sakkutooqarfik pillugu suliami politikikkut allaffissornikkullu akisussaaffimmik qulaajaasussatut sulisinneqarpa?**
- 2. Eqqartuussissuserisutut suliffimmut danskiusumut misissuisuusussamat suliakkiissut tamakkiisoq qanoq oqaasertaqarpa?**
- 3. Eqqartuussissuserisut misissuinerannik Inatsisartut kikkullu tamarmik takunnissinnaannginnissaannik aalajangiineq attatiinnarneqarpa?**

(Inatsisartunut ilaasortaq, Aaja Chemnitz Larsen, Inuit Ataqatigiit)

Tungavilersuut:

Eqqartuussissuserisut misissuinerat tamat aningaasaataat atorlugit ingerlanneqarpoq, taamaammat pissusissamisussaaq kikkut tamarmik Naalakkersuisut suliamut atatillugu peqataasutut ilanngussaannik ilisimasaqarnissaat.

Naalakkersuisooqatigiit isumaqatigiissutaanni siunniunneqarpoq pissutsit kikkunnut tamanut attuumassuteqartut pillugit ammasumik pissusilersornissap annertunerusumik isiginiarneqarnissaa.

Sullissinissamik isumaqatigiissutip kalaallinit tigummineqarunnaarnera Kalaallit Nunaannut aningaasaqarnikkut annertuumik pingaaruteqarpoq, nalornissutigineqarporlu aningaasat qanorpiaq annertutigisut tamatumani pineqarnerisut, kisianni millionit pingasunik kisitsisitallit eqqaaneqartarput.

Tamanut pingaartuuvoq paasissallugu tamanna Kalaallit Nunaata tungaaniit allaffissornikkut politikkikkulluunniit amigartumik malinnaasoqarsimaneranik peqquteqarnerisooq. Taamaammat isumaqarpunga pissusissamisoortoq Namminersorlutik Oqartussat Naalakkersuisullu Pituffik pillugu suliamut tunngatillugu pissusilersorsimanerat ammanerusumik suliarineqassappat.